

摘藻堂四庫全書薈要

集部

欽定四庫全書薈要

集部

宋詩鈔卷四



詳校官候選知縣<sub>臣</sub>吳國華

欽定四庫全書薈要卷二萬二百五十七

集部

宋詩鈔卷四

內閣中書舍人吳之振編

蘇舜欽滄浪集鈔上

舜欽字子美梓州銅山人以父任補太廟齋郎調

滎陽尉尋第進士改光祿寺主簿知長垣縣遷大理

評事監在京店宅務以范仲淹薦召試集賢校理監

進奏院舜欽所論侵權貴而婦父杜衍與仲淹富弼

在政府為時忌會進奏院祠神晏會不與者銜劾舜  
欽用鬻故紙公錢召妓樂醉歌狂悖因欲動搖衍等  
舜欽坐除名後為湖州長史卒年四十一既廢居蘇  
州買水石作滄浪亭益讀書時發憤懣于歌詩善草  
書酣酒落筆往往驚人與梅堯臣齊名時稱蘇梅劉  
後村謂其歌行雄放於聖俞軒昂不羈如其為人及  
蟠屈為吳體則極平夷妥帖蓋宋初始為大雅於古  
樸中具灝落淳畜之妙二家所同擅而梅之深遠間

淡蘇之超邁橫絕則又各出機杼永叔所謂不能優劣者也至情志忠惻而議論當理要又非詩人粗豪一流所比詩有云筆下驅古風直趨聖所存又曰會將趨古淡先可去浮囂其本領卓越如此

感興三首

後寢藏衣冠前廟宅神主吾聞諸禮經此制出中古秦嬴食先法乃復祭於墓漢衣以月遊於道蓋無取宣帝尊祖廟失制徧九土孝元酌前文一旦悉除去魏帝樂

銅臺遺令置歌舞昏嗣竟從之此事狂夫阻唐制益紛  
華諸陵銷嬪御曠女日哀吟於先亦奚補吾朝三聖人  
乘雲不可睹威靈已霄漢嗣皇念宗祖繪事移天光刻  
象肖神武徧勅舊遊地輸材起宮宇階城釵以金墻壁  
衣之黼功既即奉迎法仗疊簫鼓玩好擇珍奇目奪不  
可數三京佛老家已有千數處朝家雖奉先越禮古不  
許君不祭臣僕父不祭支庶丹楹豈非孝聖貶甚蕭斧  
大祀當以時寢廟即其所惜哉共儉德乃為侈所監痛

乎神聖姿遂與佛為侶蒼生何其愚瞻歎走旁午賤子  
私自嗟傷時淚如雨

昔在帝舜日光宅闢四門所貴無凶邪德教日益敦末  
世多濫姦九重嚴大閤扞擷主譏察誰何辯語言一關  
百力士列立甃石溫設官按尺籍唱號於未昏唐末稍  
懈怠嘗值外使奔京城凶豪兒奮劍闖帝藩狂呼嘯虎  
豹便欲傾乾坤賴有宰相在不然神器翻我朝講制度  
門籍反不存近知賤丈夫突入犯赤軒陞官未暇執叟

叟何其喧祖宗創業難慎重在後昆勇夫猶重閉況乃  
天子尊何羅猶宜察況乃外寇屯興語一及此舌出反  
自捫吾家本寒微世受朝廷恩欲奏鴟鴞詩當途誰薦  
論

瞽說聖所擇愚謀帝不罪況乎言有文白黑時利害前  
日林書生自謂胷臆大潛心撫世病策成謂可賣投穎  
觸諫函獻言何耿介云昨見凶星上帝下警戒意若曰  
昏拯出處恣蜂蠆安坐弄神器開門納珍賄宗支若繫



囚親親禮日殺大臣尸其柄咋舌希龍拜速速伐虎叢  
無使自沉瘵陛下幸察之聰明即不壞如忽賤臣言不  
瞬防禍敗一封朝飛入羣目已眦睚力夫暮塞門執縛  
不容喟十手捽其胡如負殺人債幽諸死牢中繫灼若  
龜蔡亦既下風指黥面播諸海長塗萬餘里一錢不得  
帶必令朝夕間渴飢死於械從前有口者踣脰氣如僊  
獨夫已去除易若吹糠稗奈何上帝明非德不可蓋倏  
忽未十旬炎官下其怪乙夜紫禁中一燎不存芥天王

下牀走倉猝畏挂礙連延舊寢廷頓失若空寨明朝黃  
紙出大赦徧中外嗟乎林書生生命不可再翻令凶惡  
囚累累受恩貸

慶州敗

無戰王者師有備軍之志天下承平數十年此語雖存  
人所棄今歲西人背世盟直隨秋風寇邊城屠殺熟戶  
燒障堡十萬馳騁山嶽傾國家防塞今有誰官為承制  
乳臭兒酣觴大嚼乃事業何嘗識會兵之機符移火急

蒐卒乘意謂就戮如縛尸未成一軍已出戰驅逐急使  
緣嶮巖馬肥甲重士飽喘雖有弓劍何所施連顛自欲  
墮深谷騎騁指笑聲嘻嘻一麾發伏雁行出山下掩截  
成重圍我軍免胄乞死所承制面縛交涕涕逡巡下令  
藝者全爭獻小伎歌且吹其餘剝截放之去東走矢液  
皆淋漓首無耳準若怪獸不自愧恥猶生歸守者沮氣  
陷者苦盡由主將之所為地機不見欲僥勝羞辱中國  
堪傷悲

及第後與同年宴李丞相宅

十年苦學文出語背時向  
荅力不自知藝園輒掉鞅  
薄伎遭休明一第君所唱  
拔身泥滓底飄迹雲霞上  
氣和朝言甘夢好夕魂王  
軒眉失舊斂舉意有新况  
爽如秋後鷹榮若凱旋將  
台府張宴集吾輩縱謔浪  
花梢血點乾酒面玉紋漲  
狂歌互喧傳醉舞迭闋伉  
茲時實無營此樂亦以壯  
去去登顯涂幸無隳素尚

昇陽殿故址

昔在開元中此名昇陽殿西通大明宮夾道直如箭至  
尊黃金輿乘春日幸宴翠嬪夏鐘鼓歡呼奏新徧巧舞  
風燕翻妖歌露鶯囀酒光射錦幄上下花會炫雕盤堆  
繁英艷粉弱自戰天歡日無窮臣諫莫敢獻樂極哀繼  
之在理亦可見兵來塞宮闕紅塵污香薦縱火寢廟平  
揮戈君臣迸庸嗣忽前醜泚巢復更亂冉冉竟覆亡返  
為耕牧便瓦礫雖費犁土壤頗肥衍蓋由殺人多膏血  
浸清遠髑髏今成堆皆昔燕趙面每因鋤耨時數得寶

玉片今秋雨澤多穀穗密如辦農惟喜豐稔吾獨憫遷  
變不有失德君焉為穡夫佃大國尚如此小人易流轉  
道德可久長作詩將自勸

藍田悟真寺作

旅食長安城迴遑奔走無停行清懷壯抱失素向胃中  
堆積塵土生偷閒得至玉峰下為聞悟真之寺之嘉名  
杖筇赤脚渡藍水細流激激心骨清仰看蒼山高峰旁  
白雲明滅藏日光行人遙指置寺處正在白雲之中央

逡巡緣棧更險絕攀蘿捫壁隨低昂朋行咫尺乃相失  
已與雲霧相翱翔時聞啼鳥如吹竹數步一休還縱目  
行行未知高則危下視昏煙覆平陸滿巖佳樹光樸檉  
赫赤如霞間濃綠是時八月初路旁已見芬芬菊貪竒  
戀景不知倦側睥又復心瑟縮神魂飛下大壑幽定省  
移時進雙足寺門高開朝日輝丹青黥淡唐時屋老僧  
引我周遊看且云白氏子詩乃實錄此詩疇昔予所聞  
殷勤更向碑前讀按言索像今無復惟有流泉數道如

車輻我嫌世界欲暫居又云此地無留宿殿宇之後林  
莽中日暮常有虎豹伏鑿石龕邊崖至深近有浮屠於  
此相棖觸快心宿忿兩不解一乃顛擠死其谷我聞為  
之久顰蹙感此向期將避煩辱不謂傷生事更多爭如平  
地隨流俗歎息回頭急出山始覺全軀已為福

興慶池

餘潤漲龍渠疏溜連清漣助曉遠昏山浮秋明刮眼漁  
歸別浦聞雁下滄波晚岸北有高臺離魂蕩無限



長安春日效東野

前秋長安春今春長安秋節物自榮悴我有樂與憂窮  
閤何卑漏時燕不見投門庭謝過從蘭萌舒綠柔燕託  
喜廣厦亦非善是仇蘭生靜愈茂堪將義為儔芳香誠  
可慕對之蠲窮愁

太行道

行行太行道一步三歎息念厥造化初夫何險此極陰  
沈無底壑前後至頑石高者欲作天朋黨深者疑斷地

絡脉夜中巖下埋斗杓日午陰壁風雪號攀緣有路到  
絕巔四望羣峰合沓如波濤忽至逼側處咫尺顛墜恐  
莫逃嗟乎古昔未開時隔截往來人不思淳源一破山  
嶽碎巧心遂去緣嶮巖嶮不窮甚可畏悼此二者亡  
其宜天地不自嶮嶮由人為之彼車摧輪馬傷足中路  
勿歎勿慟哭世上安塗故有馬孰使汝行此道驅高軒  
喪墜不收宜爾然

對酒

丈夫少也不富貴胡顏奔走乎塵世予年已壯志未行  
案上敦敦考文字有時愁思不可掇崢嶸腹中失和氣  
侍臣得來太行巔太行美酒清如天長歌忽發淚迸落  
一飲一斗心浩然嗟乎吾道不如酒平褫哀樂如摧朽  
讀書百車人不知地下劉伶吾與歸

夜中

夜分衆誼死耿耿抱真履中君湛以寧不為外官使七  
兵乘間入攻剽勢向圯主將不謀陣敵惡蕩然失守遽

藏避駭浪奔騰一刻萬里紛紛變化無窮已俄如獨繭  
絲忽復滿天地乳虎不受縛狂龍難馴致我思精甲以  
扞異類邪慝弗萌元辟復位輔以逍遙之至道爛然光  
輝照無際

蜀士

蜀國天下險竒怪生中間有士賈其姓抱才東入關獻  
策叩諫鼓其言蔚可觀願以微賤軀一得至上前掉舌  
滅西寇畫地收幽燕且云太平久兵戰無人言臣嘗學

其法自集數百篇治亂與成敗密然不可刪三獻輒罷  
去志屈心悲酸將相門戶淡欲往復見攔負販冒日熱  
引重衝雪寒羈苦輦轂下以圖晨夕餐如此三歲餘夜  
夜抱膝歎義者或賑給遂復歸巴川嗟乎區宇大此徒  
亦已繁城市與巖穴隱默孰辨旃幸得出自鬻何惜置  
末班吾相柄天下處事當機先古之設爵位蓋欲英雄  
躔次第立名級不使智慮間稍有才器者必以祿仕牽  
所患在不出既出那棄捐放蛟入大水驅虎還溪山失

一故無害其類莫可攀

己卯冬大寒有感

延川未撤警夕烽照冰雪窮邊苦寒地兵氣相躔結主  
將初臨戎猛思風前發朝笳吹餘哀疊鼓暮不絕淹留  
未見敵愁端密如髮予聞古烈士自誓立壯節九泥封  
函關長纓繫南越本為朝廷羞寧計身命活功名非與  
期冊書豈磨滅然由任遇專醜類易翦伐訓士無他才  
賞罰在果決近聞邊方奏中覆多沉沒罪者既稽誅功

者不見閼雖使頗牧生勇智當坐竭或云廟堂上與彼  
勢相戛恐其立異勲歛然自超拔不知百萬師寒刮膚  
革裂關中困誅斂農產半匱竭我欲叫上帝願帝下明  
罰早令黠羌亡無為生民孽

獵狐篇

老狐宅城隅涵養體豐大不知窟穴處草木但晻藹秋  
食承露禾夏飲灌園派暮夜出旁舍雞畜遭橫害晚登  
埤塊塢呼吸召百怪或為嬰兒啼或變艷婦態不知幾

十年出處頗安泰古語比社鼠蓋亦有恃賴邑中年少  
兒耽獵若沉瘳遠郊盡雉兔近水殲鱗介養犬號青鵲  
逐獸馳不再勇聞此老狐取必將自快縱犬索幽邃張  
人作疆界茲時頗窘急迸出赤電駭羣小助嘯嗥奔馳  
數顛沛所向不能入有類狼失狽鉤牙咋巨頰髓血相  
潰沫喘叫遂死矣爭觀若期會何暇正首丘腥臊滿蓬  
艾數穴相穿通城堞幾隳壞久此縱凶妖一旦果禍敗  
皮為榻上藉肉作盤中膾觀此為之吟書以為警戒



舟中感懷寄館中諸君

時得告之  
山陽挈家

扁舟迎春色東下淮楚鄉側身風波地回首英俊場顧  
我本俗材百事無一長濫迹入冊府舉動初不皇乍脫  
泥滓底稍見日月光峻閣鬱前起隱嶙天中央春風花  
竹明曉雨宮殿涼溢目盡圖史接翼皆鸞鳳明窻置刀  
筆大案羅縑紉文字雖幼學鈍慵今廢忘不能溫舊習  
考古評興亡覩顏於其間汗下如流漿徒然日飽食出  
入隨羣行朝廷此多事亦合強激昂况有詔書在爛然

貼北牆奮舌說利害以救民膏肓不然棄硯席挺身赴  
邊疆喋血鏖羌氏胃膽森開張彎弓射欃槍躍馬埽大  
荒功勲入丹青名迹萬世香是亦丈夫事不為鼠子量  
數事皆不能徒只飽腹腸有如鳬雁兒啞啞守稻粱歲  
月今逝矣齒搖髮已蒼於時既無益自合早退藏諸君  
天下選才業吁異常願當發策慮坐使國富強三辰期  
順軌四海無災殃莫效不肖者所嚮皆荒唐又不耐羞  
恥但欲歸滄浪濡毫備歌詠仰首看翱翔舟中稍無事

思念益以詳恨無一稜田可以足糟糠出處皆未決語  
默兩弗臧莽不知所為大叫欲發狂作詩寄諸君鄙懷  
實所望

送李生

李生以病廢東入徂徠峰志氣尚突兀形骸已龍鍾男  
兒生世間有如絕壑松誤為風雷傷不與匠石逢哀哉  
千尺榦摧折似秋蓬

哭曼卿

去年春風開百花與君相會歡無涯高歌長吟插花飲  
醉倒不去眠君家今年慟哭來致奠忍欲出送攀魂車  
春輝照眼一如昨花已破類蘭生芽唯君顏色不復見  
精魄飄忽隨朝霞歸來悲痛不能食壁上遺墨如棲鷗  
嗚呼死生遂相隔使我雙淚風中斜

贈釋祕演

高車大馬闐上京釋曰演者何聲名當年余嘗與之語  
實亦可喜無俗情作詩千篇頗振絕放意吐出吁可驚

不肯低心事鑄鑿直欲淡泊趨杳冥落落吾儒坐滿室  
共論慤若木陷釘賣藥得錢輒沽酒日費數斗同醉醒  
傷哉不櫛被佛縛不爾烜赫為名卿數年不見今老矣  
自說厭苦居都城垂頤孤坐若癡虎眼吻開合猶光精  
雄心瞥起忽四顧便擬擊浪東南行開春余行可同載  
相與曠快觀滄溟

城南感懷呈永叔

春陽泛野動春陰與天低遠林氣藹藹長道風依依覽

景雖暫適感懷翻然移所見既可駭所聞良可悲去年  
水後旱田畝不及犁冬溫晚得雪宿麥生者稀前去固  
無望來日已苦飢老稚滿田野斲掘尋鳧茈此物近亦  
盡卷耳共所資昔云能驅風充腹理不疑今乃有毒厲  
腸胃生瘡癰十有七八死當路橫其尸犬彘咋其骨烏  
鳶啄其皮胡為殘良民令此鳥獸肥天豈意如此決蕩  
莫可知高位厭粱肉坐論攬雲霓豈無富人術使之長  
熙熙我今餓伶俚閱此復自思自濟既不暇將復奈爾

為愁憤徒滿胃嶢屹不能齊

吳越大旱

吳越龍蛇年大旱千里赤尋常秔稌地爛漫長荆棘蛟  
龍久遁藏魚鼈盡枯腊炎暑發厲氣死者道路積城市  
接田野慟哭去如織是時西賊羌凶焰日熾劇軍須出  
東南暴斂不暫息復聞籍兵民驅以教戰力吳儂水為  
命舟楫乃其職金革戈盾矛生眼未嘗識鞭笞血塗地  
惶惑宇宙窄三丁二丁死存者亦乏食冤懟結不宣衝

迫氣候逆二年春及夏不雨但赫日安得涼冷雲四散  
飛霹靂霏霏消侵癘甘潤起稻稷江波開舊漲淮嶺發  
新碧使我揚孤帆浩蕩入秋色胡為泥滓中視此久戚  
戚長風卷雲陰倚坐愁橫臆

揚子江觀風浪

晚至瓜洲渡繫舟泊西灣日落暴風起大浪得縱觀憑  
凌積石岸吐吞天外山霹靂左右作雪灑六月寒吁嗟  
至柔物威壯不可干若為神龍憑氣勢非一端大艦失



所操翻覆如轉丸高山雖有路轍險馬足酸居朝號安  
逸重祿多憂患爭得清靜交共騎雙翔鸞矯翅入赤霄  
不見此險艱奈何蚩蚩衆共處天壤間因知古聖人立  
法萬世安濟川作舟梁鑄鼎窮神姦朝廷布禮度粲粲  
莫可刪後來漸破壞所向行路難凶邪得騁志物命遭  
摧殘視此念古昔杖藜空盤桓

中秋夜吳江亭上對月懷前宰張子野及寄君謨

蔡大

獨坐對月心悠悠故人不見使我愁古今共傳惜今夕  
況在松江亭上頭可憐節物會人意十日陰雨此夜收  
不唯人間重此月天亦有意於中秋長空無瑕露表裏  
拂拂漸上寒光流江平萬頃正碧色上下清澈雙壁浮  
自視直欲見筋脈無所逃遁魚龍憂不疑身世在地上  
祇恐槎去觸斗牛景清境勝返不足歎息此際無交遊  
心魂冷烈曉不寢勉為筆此傳中州

越州雲門寺

翠嶂環合封白雲中有蕭寺三為鄰

雲門梁武所作今分為三寺相連

老松偃蹇若傲世飛泉噴薄如避人  
蒼猿嘯斷夜月古丹花開徧陽崖  
春盤桓數日不忍去舟出耶溪猶慘神

### 和韓三謁歐陽九之作

予方居憂艱宵懷積瘡刺昏明走日月慘慘絕生意闔  
門厭過從揜耳避時事韓子我所佳招我懃有謂城南  
訪永叔共可豁蒙蔽是時窮陰久泥淖沒馬鼻區區不  
憚遠飢渴奔高誼永叔聞我來解榻顏色喜殷勤排清

樽甘酸飮果餌圖書堆滿牀指論極根柢伊余昏迷中  
忽若出夢寐劃然毛骨開精神四邊至既歸尚泠然數  
日飽滋味韓子歎不足作詩暢精義爛如珊瑚鈎光艷  
不可閉迫余使之和庶以同氣類自顧屯鈍極出語少  
姿媚挾別雖強成徒使腸胃沸永叔經術深爛漫不可  
既雖得終日談百未出一二倉皇逼行役蕭颯包素志  
不日便乖拆安能訖精粹他年老門牆君子無我棄

城南歸值大風雪

一夜大雪風喧阗未明跨馬城南回四方迷惑共一色  
揮鞭欲進還徘徊舊時崖谷不復見縱有直道令人猜  
低頭搶朔風兩眼不肯開時時偷看問南北但見白羽  
之箭紛紛來既以脂粉傅我面又以珠玉綴我顙天公  
似憐我貌古巧意裝點使莫偕欲令學此男女態免使  
埋沒隨灰埃據鞍照水失舊惡容質潔白如嬰孩雖然  
外飾得暫好自覺面目如刀裁又不知胷中肝膽挂鐵  
石安能柔軟隨良媒世人飾詐我尚笑今乃復見天公

乖應時降雪故大好慎勿改易吾形骸

出京後舟中有作寄仲文韓二兄弟永叔歐陽九

和叔杜二

久居倦京塵歸心日傾寫扁舟理棹楫已與峻流下斷  
岸如崩山遠樹若奔馬回頭雲間闕出沒見圖畫還家  
快雖暫去國傷以乍况我二三友眷戀數迂駕前夕南巷  
堤昨日東城舍論精如可收意密不見罅恍惚夢寐中  
蕭然已相捨他人所至樂惟我氣類寡迂僻不能鑄往

往自嗟罵平生居京都君輩乃知者異鄉孰與言救謗  
定不暇柔軟衆所佳佞面誰可借中懷百憂集包釀似  
菹鮓身世苦飄浮歲月不可把後期浩難知高吟但悲  
灑

### 大風

秋半收穫登郊原歌側小屋愁夕眠是夜大風拔樹走  
吹倒南壁如崩山夢中驚起但呼叫病僕未動徒虓喧  
驅令燃火徧照燎瓦甍狼藉滿我前披衣抱枕欲避去

去此乃是曠野田况時風怒尚未息直恐涇渭遭吹翻  
露坐不免念禾黍必已刮刷無完根六事不和暴風作  
嘗聞洪範有此言昔時大風禾盡偃上帝蓋直周公寃  
方今天子至神聖惟恐臣下辜其恩是何此風乃震作  
吹盡秋實傷元元有能返風起禾者亦足表異知所存  
至誠皎潔固不昧時雖今古同乾坤

檢書

煩心思所持屏事入小閣踣撲下塵梁侈哆張敗笈雨



爛百數翻蟲食三四夾軒昂醉墨開纖悉新書雜魚子

或破碎蠶兒尚狎恰快心伯長文跋尾清臣榻幼辭反  
知進故句時自愜墜亡多玩愛存聚必券帖疎密交及  
戚前後生與殪誨束儼父師寒暑布兒妾謔浪笑忽還  
私匿情再接愴事涕泫泫時歎啗啗一餉誠寂寞千  
里遽會合遊心到句角開眼見蒼雪京華歷歷復節物  
忽忽涉恍爾驚異方遁去乃幾臘回頭厭襞積舉體覺  
疲茆束閣聊欠伸夢斷風一颯

別鄰幾子賦高山詩以見意

高山扶層巔下與地盤結氣貫不變移澤枯乃朽裂有  
如善人交生死兩固節語默無異方黯沮在為別世風  
隨日儉俗態逐勢熱負子好古心嗟歎星斗滅近得鄰  
幾生曾懷貯霜雪飢渴入冊書趣向著羈絏又與斯人  
離先日心破折古也當貽言在子可捫舌奈何區區誠  
敢以御者說器成必刊琢德盛資澡刷空文謾徽墨古  
訓乃佩玦帝門急豪英濟物無自子

雜興

虎豹性食人智者畜為戲形影本相親愚夫見而畏疑  
同不疑異遠哉愚與智

往王順山值暴雨雷霆

蒼崖六月陰氣舒一霎暴雨如繩粗霹靂飛出大壑底  
烈火黑霧相奔趨人皆喘汗抱樹立紫藤翠蔓皆焦枯  
逡巡已在天中吼有如上帝來追呼震搖巨石當道落  
驚嘯時聞虎與驅俄而青巔吐赤日行到平地晴如初

回看絕壁尚可畏吁嗟神怪何所無

依韻和勝之暑飲

九夏苦炎烈入伏氣候惡况茲大旱時其酷甚炮烙爭  
得昇復生射此赤日落欲擘青天開騰身出寥廓狂走  
無處逃坐恐肝腦涸不如以酒澆庶可免焦爍相呼坐  
僧居頃刻醕百酌佳瓜判青膚熟李吸絳膜尚嫌味不  
爽更與冰雪嚼裂耳發浩歌解顏縱善謔逕趨無何鄉  
回覺萬事錯不知余中虛外冷得所託真氣潛遁亡半

夜忽發霍嘔洩不暫停迸筋走兩脚初如巨繩纏忽似  
秋蚓躍委頓體不支藜牀為穿鑿君言暑飲佳但得一  
餉樂艱難逾旬時僅飲數斗藥快意事皆然遺殃慎無  
作

答宋太祝見贈

窮冬三日雪旅腸迫枯餓不免東郭行難效袁安卧我  
謁故所宜君來無乃左復覲長句詩如留萬金貨恣睢  
莫能名豪橫不可挫怒奔時旁出力翦復下墮使人但

驚絕欲繼誰敢作况君名家駒少小聲已播丈夫氣剛  
精不必在長大譬如利錐末所向物已破余資本滯濁  
既壯困家禍區區走俗格僅若螳循磨詩枯實零丁文  
僻又坎坷翹然當路人顧我甚涕唾雅意反願交得無  
自卑浣俛首已內傾撫躬輒私賀無以答高誼胷中強  
搜邏披豁聊短篇安足謂酬和莞爾當棄投毋留重吾  
過

送李冀州詩

冠蓋雜還車馬稠都門曉送李冀州冀州綠髮三十一  
趨趨千騎居上頭眼如堅冰面珂月氣勁健鶻橫清秋  
不為名利所汨沒直與忠義相沉浮干戈未定民力屈  
此行正解天子憂男兒勝衣志四海實恥坐得萬戶侯  
旆旌明滅平野濶笳鼓淒斷邊風愁孤雲南飛莫回首  
下有慈親雙凝眸自古忠孝不兩立功名及時乃可收  
衆人刮目看能事著鞭無為儒生羞

和鄰幾登繁臺塢

孝王有遺墟寥落千年餘今為太帝宅復此繁華都踊  
甓冠舊丘西人號浮圖下鎮地脉絕上與雲煙俱我來  
歷初級穰穰瞰市衢華衡盡丘垤大河乃污渠躋攀及  
其巔四顧萬象無迥然塵坩隔頓覺襟懷舒俄思一失  
足立見糜體軀投步求自安不暇為他謨平時好交親  
豈復能邀呼舉動強自持恐為衆揶揄一身雖暫高爭  
如且平居君子不倖險吾將監諸書

依韻和伯鎮中秋見月九日遇雨之作



衆皆愛春發枯荄我知惟動兒女懷天地昏酣醉夢裏  
人有爽思皆沈埋豈如秋風勁利劇刀劍刮破天膜清  
光開衰根危蒂埽除盡辨別松竹并蒿萊青娥供霜洗  
夜月兼以皓露驅纖埃常年此夕或陰晦今歲澄澈特  
快哉是時呼賓賞此景漸見照我白玉杯清輝向人若  
有意經歷窗戶猶徘徊放歌狂飲不知曉爛熳酌客山  
嶽頽時節飄流晦朔轉已覺九日來相催北軒隙地破  
蒼蘚帶花移得黃金栽倒冠露頂坐狂客擷香咀蕊浮

新醅最憐小雨灑疎竹爽籟颯颯吹醉顙君時傳詩頗  
精麗意苦泥淖不得來開緘文采自飛動欲和但愧頑  
無才久之黽俛強為答嫌春愛秋真可咍

夜聞秋聲感而成詠同鄰幾作

八月天氣肅萬物日已闌庭前兩高桐夜籟如哀絃志  
士感節物中夕耿不眠起聽抱膝吟悲烈聲相干念此  
華葉改想見顏色鮮顧人生世間榮悴理亦然豈傷歲  
月速愧無功名傳少小學文章出值用武年儒官多見

侮敢為戰士先欲棄俎豆事強習孫吳篇迂鈍不可為  
屈曲性亦難虛言盜祿食實又畏上天未能追世好且  
樂樽酒間九日近不遠同醉黃花前

和聖俞庭菊

不謂花草稀實愛菊色好先時自封植坐待秋氣老類  
粧翠羽枝已喜金靨小嚴霜發層英益見化匠巧搖疑  
光艷落折恐叢薄少一日三四吟一吟三四遶賞專情  
自迷美極語難造得君所賦詩爛漫愜懷抱朗詠償此

心清樽為之倒

荅梅聖俞見贈

自嗟處身拙與世嘗齟齬至於作文章實亦少精趣低  
摧朝市間所向觸謗怒夫子與衆殊琢飾貺佳句將然  
紙上動讀畢恐飛去自覺異平居恍惚忘世故迥如出  
泥塗熏滌失臭污衣之青霞裾飲以紫蕊露輜軒駕飛  
黃蹠躩上雲路古貴知者稀流俗豈足顧雅意雖可珍  
三復未敢報退慚百不堪尚恐君悔誤

舟至崔橋士人張生抱琴攜酒見訪

晚泊野橋下暮色起古愁有士不相識通名叩余舟  
鏗語言好舉動亦風流自鳴紫囊琴瀉酒相獻酬余少  
在仕宦接納多交遊失足落坑穽所向逢戈矛不圖田  
野間佳士來傾投山林益有味足可銷吾憂

維舟野步呈子履

白日出高岡遠野春氣動蒼鳩鳴相歡幽草色已弄繁  
舟大河曲登步目一縱逍遙玩物華所樂與君共已忘

竄逐傷但喜懷抱空古人負才業未必為世用吾儕性  
疎拙擯棄安足痛四顧不見人高歌免驚衆

滯舟

落照滿長河流水暖冲融中有鳬鶩羣上下隨和風捕  
魚沒淺浦矯翅入紫空嬉遊意自得肯顧冥冥鴻伊余  
何所適舟滯數見窮十步九暗灘咫尺不可通獠工裂  
吻噪捨檝將何從巨絙挽屢斷有如拔山峰夕憂寇盜  
至蹶弩映岸叢徊徨但搔首歎息無所容曾無鳥禽樂

虛在人曹中

過濠梁別王原叔

交道今莫言難以古義責錙銖較利害便有太行隔予  
生性濶疎逢人出胃臆一旦觸駭機四向盡戈戟平生  
朋游面化為虎狼額謗氣慘不開中者苦病疫遂令老  
成人坐是亦見斥既出芸香署又下金華席摧辱實難  
任官名亦非惜罪始職於予時情未當隙今來濠川涯  
日夜自羞惕高風激頽波相遇過疇昔白壁露肺肝晴

雲見顏色乃知天壤間自有道義伯明日又告行吁嗟  
四海窄

尹子漸哀辭

有序

予昨得罪子漸數相過感慰激切恐予重得罪于朝  
也其意結括避慎非昔時子漸也與之劇飲則必作  
薤露長歌舉音淒斷坐中不忍聞已而又有厭苦世  
故之說予謂死者人之所惡子何樂焉對曰吾未嘗  
死安知死之不樂也生理局促不足樂見之矣既別



才百餘日子漸化去豈其魄兆歟予始聞之怛然震  
起為出涕徐又追其緒言作哀辭以寄執紼者

漂流江湖外負罪氣慘悽况聞故人死驚呼不成啼當  
案舍七筓緬懷大河西箴言尚在耳鏗若環珮隨志氣  
凜已失神魂飄何之昔云死者樂復以生為悲予知達  
士懷將以二物齊今也果何如無乃往意迷荆棘飽雨  
露叢蘭委汙泥紫鸞忽腸絕永年賦狐狸天理莽難問  
我意多乖睽哀吟蒼山濶注目白日低不得慟寢門雪

涕江上隄

天平山

吳會括衆山戢戢不可數其間號天平突兀為之主傑  
然鎮西南羣嶺爭拱輔吾知造物意必以屏大府清溪  
至其下仰視勢飛舞偉石如長人聚立欲言語捫蘿緣  
險磴爛漫松竹古中腰有危亭前對紺壁舉石竇落玉  
泉泠泠四時雨源生白雲間顏色若粉乳早年或播灑  
潤可足九土奈何但泓澄未為應龍取予方棄塵中巘

壑素自許盤桓撫景勝至此快心膺庶得耳目清終甘  
死於虎

奉酬公素學士見招之作

平生交分恥苟合貴以道義久可要世俗盈虛逐勢利  
清風緬邈日以凋長吟宇宙獨引領浩浩萬古與我遙  
安得此身有兩翅颯然遠舉隨風颺近逢公素我同好  
厭憤偷薄常鬱陶君方謫官鎮京口我以重罪廢本朝  
身雖俱在漢江外不得會合煩相邀秋風八月天地肅

千里明迥草木焦吼聲慘烈氣節勁激起壯思衝斗杓  
豈如兒女但悲悵唧唧吟歎隨螳蜋擬攀飛雲抱明月  
欲踏海門觀怒濤念君治所近不遠江山蟠闢氣象豪  
樓頭陰明變霞霧檻下日夕鬪蜃蛟便將一往刷滯悶  
去興草茁不可休呼兒襍衣辦舟楫一日百里豈憚勞  
君方酒酣亦思我奔墨紙上為長謠上言風物麗復壯  
下述宴集樂且遨意我羈愁正無賴欲以此事相誇招  
此篇筆絕墨未滲我舟適到范老橋古人千里有神會

以茲可信非相遼倜然不以窮見棄曠然不以位自驕  
開緘朗詠毛髮竦通夕噤痒睫不交病膜誰將寶篋刮  
痒背恰得仙人抓長川奔渾走一氣巨鎮截薛上赤霄  
又如陰雲載雷電光怪迸漏不可包驚呼歎伏已不暇  
焉敢有意爭其高却疑欺我老困頓故作大句來相鏖  
近罹罪辱舌雖在每避嫌謗口已膠更遭掀攪豈不畏  
欲取筆硯俱焚燒既承嘉命敢無報將吐復茹移昏朝  
留連日日奉杯宴殊無間隙吟風騷看君岸幘卷大白

有似巨浸吸百潮賓從傾頽尚未厭直恐潰爛腸與脬  
神迷耳熱眼生纈嚼盡寶壓狂醒消歡流樂極古所誠  
不免厭旦潛遁逃還家數日却愁寂夢中猶奉笑與嘲  
強為短篇荅高誼鄙思軋軋空自撓覽之捧腹定絕倒  
幸為投棄毋傳抄相思復思往相會予今豈復如繫匏  
行看雪夜景清絕更乘逸興飛輕舫

遷居

前歲旅淮楚去年還上都上都一歲內前後七徙居歲

暮被重謫狼狽來中吳中吳未半歲三次遷里閭京師  
重騰移長物動數車江湖亦稍便一舟已有餘破壞新  
器皿散亡舊圖書家人頗倦煩行路亦歎呼吾知人之  
生天壤乃遽廬其間暫寄寓一世還須臾縱遊極南北  
所歷足自娛猶恨苦滯留舉動攜妻孥何由出八極浩  
與元氣俱仰首羨日月東西競奔趨二物本無情亦為  
氣所驅況我有血肉又生名利區手足日不閒在地無  
根株流宕固宜矣何必厭道塗此身亦外物安用傷羈

孤庸人所見狹但以鄉井拘屑屑寸粒食何異雞在笊  
擬隨犯斗槎欲上浮海桴寄語懷安者嗟嗟爾何愚

若神棲心堂

予心充塞天壤間豈以一物相拘闢然放一物無不有  
遂得此身相與間上人構堂號棲心不欲塵累相追攀  
冷灰藁木極潰敗雖有善迹輒自刪予嘗浩然無所撓  
與子異指亦往還卷舒動靜固有道期於達者誠非艱  
郡侯訪予於滄浪亭因而高會翌日以一章謝之



荒亭俗少遊遷客心自愛繞亭植梧竹私心亦有待昨  
朝千騎來趨趨擁林外水禽駭笳鼓野老瞻車蓋公餘  
喜靜境賓至因高會跂石已行庖臨流聊褫帶優遊鄙  
情通放曠末禮殺酒醇引易醕肉美舉必嘏千蹠恣食  
雞二螯時把跪解顏聞善諷傾耳得嘉話暮夜歡未厭  
徘徊意將再見跋已懜騰跨鞍極倒載明日尚狂醒嘉  
貺不遑拜

送關永言赴彭門

鄙性背時向處身介且迂自固以為節人皆指為愚少  
年宦京邑與衆頗異塗一朝被放棄漂然落江湖江湖  
信美矣心迹益更孤永言金閨彥器識當世無機發弦  
上矢辯走盤中珠高風落溪山恥與勢利趨殊科二十  
年不肯仕京都顧我窮悴者一笑情相於日日奉盃宴  
但覺懷抱攄瓊琚照坐席內顧瓦礫麤未飲心自醉相  
對氣已舒得忘羈旅憂蓋以道義俱雲間宿古寺花下  
招歌姝勝境尋已遍賞心未嘗辜璽書趣赴治候吏擁

舳艫秋風卷大旆  
喧喧指東徐郊亭  
對別酒我獨增悲  
吁人生大塊間  
氣類有萬殊  
賢愚各有合  
唯予邈無徒  
君子誤見知  
交契若勘符  
一旦又睽索  
千里成濶疎  
期君早自奮  
佐時發雄圖  
功成速收身  
單舸還東吳  
白頭青林下  
罇酒相從娛

夏熱晝寢感詠

盛夏日苦永解帶坐小軒  
對案不能食揮汗白雨翻  
輒輒過午景宛轉無由昏  
偃卧一榻上既覺復夢恬然

世慮寂時被蒼蠅喧睡味勝仙去忽恍難俱論晨事如  
隔日半雜夢寐言人生貴壯健及時取榮尊夏禹惜寸  
陰窮治萬水原櫛沐風雨中子哭不入門况復庸下者  
不出強趨奔奈何但耽寢懶惰守壞垣念昔年少時奮  
迅期孤鶩筆下驅古風直趨聖所存山子逐雷電安肯  
服短轅便將決渤澥出手洗乾坤文章竟誤身大議誰  
周爰捭首下牢獄殄殄如孤豚法吏使除籍其過祇一  
殮賓朋四散逐投竄向僻藩九虎口牙惡便欲膏其蹠

上賴天子明不使鉗且髡此身自流浪豈能濟元元天  
下無所歸汎舟旅江村春雨看秧稻落日自灌園殊鄉  
寡朋友孰辨石與珉卷藏經濟術強談奉狙猿間因尚  
有待不忍沉湘沅大暑晝閉戶一徑惡草繁出嫌鳥噪  
噪行見蛇蜿蜒蠹書徒盈篋濁醪徒盈樽談笑誰可共  
道義孰與敦終日對稚孺千里遠弟昆此心既無用不  
寢徒自煩况茲晝景長但厭枕簟溫北窗無纖風返見  
赤日痕流光何輝赫獨不照覆盆會當破氛祲血吻叫

帝閭爛爾正國典曠然滌羣寃姦讒囚大幽上壓九崑  
崙賢路自肅爽朝政不復渾萬物宇宙間共被陽和恩  
哭師魯

前年子漸死予哭大江頭今年師魯死予方旅長洲初  
聞尚疑惑涕淚已不收舉杯欲向口荊棘生咽喉憶初  
定交時後前穆與歐君顏白如霜君語清如流予年又  
甚少學古衆所羞君欲舉拔萃聲耦日抉搜不鄙吾學  
異推尊謂前修今踰二十年迹遠心甚稠後會國南門

夜談雪滿樓青燈照素髮酒闌氣益道昨君握兵柄節  
制關外侯予才入冊府俄作中都囚飛章力辨雪危言  
動前旒時雖不見省凜凜壓衆偷旋聞君下獄六月送  
渭州渭州舊治所昔擁萬貔貅堂中坐玉帳堂下森蛇  
矛令嚴山石裂恩煦春色浮釁生無根牙衆言起愆尤  
返來入狴犴吏對安可酬法冠巧摧拍刺骨不肯抽削  
秩貶漢東驅迫日置郵窮途無一簪百口誰相調諸子  
繼死亡清血漬兩眸貿然幾喪明憤苦結不瘳君性本

剛峭安可小屈柔暴罹此冤辱苟活何所求人間不見  
容不若地下遊又疑天憎善專與惡報讐二豎潛膏肓  
衆鬼來擲厥棄局奔南陽後事得所投心膽尚卓犖精  
明已彌留生平經緯才蕭瑟掩一丘青天自茫茫長夜  
何悠悠萬物孰不死死常在嚴秋君齒方盛壯衆期樹  
風猷二邊况橫猾四海皆瘡疣斯時忽云亡孰為朝廷  
憂予方編吳氓日自親鋤耰無緣匍匐救兀兀空悲愁  
時思莊生言所樂唯髑髏物理不可詰此說誠最優



和永叔瑯琊山庶子泉陽冰石篆詩

一氣破散萬事起獨有篆籀含其真周鼓秦山壞已久  
下至唐室始有人宗臣轉注得天法質雖渾厚氣乃振  
人間所存十數處豐疎異體世共珍其中琅瑯石泉記  
比之他法殊不倫鐵鎖關連玉鉤壯曲處力可掛萬鈞  
復疑蛟虬植爪角隱入翠壁蟠未伸近來俗眼苦不賞  
唯有風月時相親紫微仙人謫此守此地勝絕舊喜聞  
公餘往觀領賓從獵獵畫隼搖青春遠休車騎步泉側

酌泉愛篆移朝昏揮弄潺湲玩點畫情通悅忽疑前身  
作詩緘本遠相寄邀我共賦意甚勤昨承見教久閣筆  
壓以大句尤難文永叔近以書戒予作詩高風勝事日傾倒安得  
身寄西飛雲

答章傳

廢官旅吳門迹與世俗埽構亭滄波間築室喬樹杪窮  
經交聖賢放意狎魚鳥志氣內自充藜藿日亦飽不圖  
名利場有士同所好南閩章其氏傳名字傳道清晨闕

予門疎爽見姿表大篇隨自出爛漫風力老安敢當所  
褰讀之欲驚倒開軒延與語指亦有深到半生踏京塵  
識予恨不早扶疎珊瑚枝本不自彫巧當珍玉府中何  
故委衰草秋風還故鄉無或歎枯槁富貴烏足論令名  
當自保

寒夜

九河巨凍流長澀山高微黯石色頑沙籠如煙吐朱灣  
中天擣鼓雲垂關壺炙不溫乳烏死城上琴聲愁九子

羅幕翻風花滿波  
玉塵灑窗濕明綺  
獸角消紅屏鳳乾  
縷生篆字香盤盤  
坐聆翰音拂南極  
馳念疆場中已酸  
欲決沉雲叫陰帝  
掃蕩不使天下寒

宋詩鈔卷四

總校官庶吉士臣張能照  
校對官庶吉士臣陳文樞  
謄錄監生臣趙友彬

欽定四庫全書薈要

集部

宋詩鈔卷五

詳校官候選知縣臣吳甸華



欽定四庫全書薈要卷二萬二百五十八集部

宋詩鈔卷五

內閣中書舍人吳之振編

蘇舜欽滄浪集鈔下

送施秀才

賤生罹凶喪日與死亡逼  
羈孤困猜嫌動步畏蛇蝎之  
子脫俗情平生未相識足  
繭千里來顧我喜顏色衣裘  
風霜凋顏髮塵土蝕開席揖之坐意勤語腴塞徐徐動

辭氣突兀露胃臆紺囊出文章發覆見寶碧自羞無所  
有曷以報相德告行東風前花草正狼藉又無一樽酒  
澆沃慰遠客扁舟下長淮企立空歎息

送韓三子華還家

人在天壤間共為氣驅逐歲月自崩奔冉冉若轉轂榮  
樂隨雲煙凋零共草木亨屯固常物達者安可速奈何  
此軀骸未免混世俗前年奔大凶况復墮手足零丁旅  
山陽逐熟聚衰族相逢眼盡白閉戶甘退縮左丞鎮京



毫相去路重複數道令子來千里弔荼毒子華勇此行  
東下甚匍匐入門未及言相向且慟哭嗟我顏色枯鬚  
蒼髯雙禿相別始踰年世事何反覆晤言出古表但覺  
白日速勘書春雨靜煮藥夜火續襟懷兩沉淡炯炯抱  
明玉時苦外物喧又嗟別期促和風送歸帆盍動淮氣  
綠早寄別後篇微吟慰孤獨

觀放陣

沉沉滄淮口植木限衆流啓閉固有時出納千萬舟春

予懷抱昏羈別相牽鉤觀此巨派注頗覺滯悶瘳喧  
怒霆起始駭久不收既前目眩轉足縮不敢留朔雪下  
噴薄散為白霧浮上懸赤油幕旁斷縹玉旒恐激地軸  
轉人有魚鼈憂驚嗟勢力壯孰謂此物柔吾思作至監  
實以處上游又欲接之口沃蕩胃中愁俄然漸枯涸哮  
爾空泥溝渟渟既因人開洩豈自由立間見底裏咄哉  
為爾羞

金山寺

孤峰湧滄江突兀臺殿積驚波四面起日夜走礚礚陰  
壑蓄風雲陽崖產金碧離披萬年樹根抱太古石脩廊  
轉峻閣窈窕壓山脊寶像浮海來珠纓冷光滴叩欄見  
龜鼉揚首意自得偃蹇互出沒日此飽餘食又有翠羽  
禽羣飛喜賓客口銜紺蒂花近我若相識開軒必曠絕  
上下無異色氣象特清壯所覽輒快適余心本高灑悞  
為塵土隔不知人間世有此物外迹落日將登舟低回  
空自惜

秋夜

新秋積雨後夜聞蚯蚓聲似爭絡緯繁不讓蟋蟀清嗟  
爾微陋物身與土壤并藐然本無心天時使之鳴空庭  
雜稿葉亦能感人情老蛟蟄污泥寂嘿不自驚一旦走  
霹靂飛雨洗八紘幽蟠孰可聞自有濟物誠歲若弗大  
旱此志豈忘行

送黃莘還家

東風搖江波碧草日夜芳藹藹春物歸遊子思故鄉黃

生士林華志業收精剛虎步南山隈氣立衆獸旁不肖  
受羈轡但欲插翅翔顧亦念所親歸心劇風檣想當舍  
檝初喜氣充門墻晨昏奉顏色以時薦豆觴雖享萬鍾  
祿此樂不可償予家白日下偶來戀滄浪因君江上別  
撩我歸興長

和菱磎石歌

滁州信至詫雙石云初得白菱水濱長篇稱夸語險絕  
欲使來者不復言畫圖突兀亦頗怪張之屋壁驚心魂

麒麟才生頭角異混沌雖死竅鑿存瑯琊之郡徧且僻  
得此固可駭衆觀予嘗飛帆入震澤窮探異境登龜鼈  
太湖二山名  
最出怪石  
居民百戶石為業日夜采琢山不貧山前

森列戰白浪猶似百萬鐵馬羣雨昏浪打歲月古千株  
萬穴僵復奔自嗟才力本衰弱安敢抵敵為之文况茲  
出產極易致鄉俗見慣不甚尊彼以至少合貴重胡為  
久棄如隱淪偶逢精識見獎拔衆目今乃稱奇珍百人  
擁持大車載城市觀走風濤翻立于新亭面幽谷共為

澡刷泥沙痕涼泉下照嘉樹陰翠影澄澹留煙雲褒以  
篇章繪縑素積歲汨沒一日伸苟非高賢獨賞激終古  
弃臥於窮津世人愛憎逐興廢使我吟歎傷精神

### 頂破二山詩

北邑有頂山下潛子母虬其子去為雨以救鄉人憂前  
壁穹峰開化出百丈湫後因號破山致祠獻庶羞歲來  
省其母風雹六月秋煙雲騰踏去不復經月留邑民賴  
其靈雖旱歲有收因成兩佛宇幽邃號勝遊礪泉走鸞

車松桂擁石樓夜堂人噤滲陰壁風颭颭近年返暴雨  
頗亦傷田疇老農務祈禱梵唄日不休常為釋徒利乃  
作生民讐嗚呼二虬者其說何悠悠

永叔石月屏圖

日月行上天下照萬物根向之生榮背則死故為萬物  
生死門東西兩交征晝夜不暫停胡為號山石留此皎  
月痕常存桂樹散疎陰有若圖畫成永叔得之不得曉  
作歌使我窮其原且疑月入此石中分此兩曜三處明



或云蟾兔好溪山逃遁出月不可關浮波穴石忠所樂  
嫦娥孤坐初不覺玉杵夜無聲無物來擣藥嫦娥驚推  
輪下天自尋捉遠地掀江踏山岳二物驚奔不復見留  
此玉輪之迹在青壁風雨不可剥此說亦詭異予知未  
精確物有無情自相感不間幽微與高邈老蚌向月月  
降胎海犀望星星入角形霞爍石變靈砂白虹貫巖生  
美璞此乃西山石久為月照着歲久光不滅遂有團團  
月寒輝籠籠出輕霧坐對不復嗟殘缺蝦蟇縱汝惡紫

吻可能食此清光沒玉川子若在見必喜不徹此雖隱  
石中時有靈光發土怪山鬼不敢近照之僵仆肝膽裂  
有如君上明下燭萬類無遁形光艷百世無虧盈

演化琴德素高昔嘗供奉先帝聞予所藏寶琴求  
而揮弄不忍去因為作歌以寫其意云

雙璫老師古突兀索我瑤琴一揮拂風吹仙籟下虛空  
滿坐沉沉竦毛骨按抑不知聲在指指自不知心所起  
節奏可盡韻可收時於踈澹之中寄深意意深味薄我

獨知陶然直到羲皇世曲終瞑目師不言忽言昔常奉  
至尊祥符天子政多暇詔求絕藝傳中閣紫宸伏退霜  
日紅隨鞭入對蓬萊宮平戎一弄沃舜聰貂璫壁立亦  
動容紫蘭之袍出禁府聲華一日千門通今來老病卧  
澤國賞音不遇前事空一雙玉鶴天上飛人間但見枯  
死桐幸逢寶器愜心手因聲感舊涕灑眉顧我踟躕不  
忍去將行更欲留悲風

寄王幾道同年

新安道中物色佳山昏雲淡晚雨斜眼看好景懶下馬  
心隨流水先還家步頭浴鳬暖出沒石側老松寒交加  
懷君覽古意萬狀獨轉澗口吟幽花

田家詞

南風霏霏麥花落豆田漠漠初垂角山邊夜半一犁雨  
田父高歌待收穫雨多蕭蕭蠶簇寒蟄婦低眉憂繭單  
人生多求復多怨天公供爾良獨難

丙子仲冬紫閣寺聯句

白石太古水

才翁

蒼崖六月水昏明咫尺變

子美

身世逗遛

增橋與飛霞亂

才翁

人無獨鳥升風泉冷相搏

子美

樓閣暮

逾澄反復青冥上

才翁

躋攀赤日稜唄音充別壑

子美

塏影

弔寒藤仙掌掛太一

才翁

佛壇依古層巖喧聞鬪虎

子美

臺

靜下饑鷹晴檻通年雨

才翁

濃蘿四面罨日光平午見

子美

霧氣半天蒸潭碧寒疑裂

才翁

鐘清遠自凝陽陂冬聚筍

子美陰壁夏垂繒有客繞佳思

才翁

高吟出遠凭雄心翻表

裏子美遠目著軒騰岑寂來清夜

才翁

沉冥接定僧宿猿深

更香

子美

落木靜相仍松竹高無奈

才翁

煙嵐翠不勝甘酸

收脫實

子美

均隩布清塋北野纔沉著南天更勃興恣睢

超一氣

才翁

黥黥起孤鵬照澗寒堪摘看雲重欲崩行中

向背失

子美

呼處下高應庭樹巢金爵樵兒弄玉繩斷香

浮缺月

才翁

古像守昏燈乳管明相照莎髯綠自矜溪疑

嘯神物

子美

欲欲敵穀陵俯仰孤心撓回翔百感登畫圖

風動壁詩句涕霑膺

先公有留題在澄心閣

歲月看流矢

才翁

心腸

劇斷絙追攀初有象悲潰遂相乘故賞知無遁遺靈若

此憑依然忍回首

子美

愁絕下峻嶒

才翁

水輪聯句十六韻

痛矣真源喪紛紜物象來

子美

水輪今若此世事亦宜哉

才翁

上下車交輻周旋斗轉魁

子美

咸淵日微墮仙窟月初

才翁

開旁梃從為用垂絙重亦回枘多初不曉機密暗相

子美

該圃外滄浪洩庭間霹靂摧玉飛千仞表纓掛九泉

才翁

隈翻覆殊難定牽連巧自媒建瓴今比速抱甕此相

子美

哀平眠曾無覺淡窺遂可猜團團釋子壁軋軋雁王

臺

才翁

解見陶埏運寧觀將轂推造端緣有發汲用始知

材

美子

本異道家意定遭怡士咍轉圓非雅具歌器有淡

災

才翁

持滿忘前監相傾自下催流風無以復視此一排

徊

美子

薦福塏聯句

踴覽皇都壯

才翁

盤基紫宙雄山河供遠目

王緯

簷戶發高

風梯險三休上

美子

輪開一氣中門當谷子午

才翁

影落陌

西東韻鐸翻天籟

緯

危甌駐夕紅側聆悲下俗

美子

仰面



識長空絕若神擠至才淡疑壑暗通人寥如蟻蛭緯身

世甚秋蓬歎息興亡地美子沉吟製作工清思抱明月狂

欲把飛鴻去矣登臨興才魏乎造化功涼襟當爽塏幽

意入鴻濛頭角峰如揖緯丹青樹不同城郭回迤邐閣

殿失穹隆可使孤懷放美子胡為萬恨終何當得壯士提

取出塵籠才

悲二子聯句穆伯長  
凌伯華

有客自遠方來以二子說穆子病疾初家事巨細缺鄰

人苦其求

才翁

醫師久已決案盃小大空布被旁午裂餘

喘尚能鼓

子美

老憤知己結目淒望羊泓髭斷反蝟茁憂

酸繫餘生

才翁

嗥嘯留永訣語妻後日計書策未可徹教

子立世資

子美

圓曲勿自說吾屬何流離衆人方草竊凌

子久道路

才翁

十口著羈綫恰旅重江間正值大飢節既

無裹飯交

子美

疾走繼麤糲又無執漿人及時沃枯渴惜

哉損天命

才翁

痛馬在親經帝胡生爾身世復稱其傑胃

伏氣萬丈

子美

腸貯怨百折艱難泊風波憔悴墮霜雪久

僕勤龍鍾

才弱

女癡蹠躅文隨寒餓空道與煙焰滅魂

兮竟何歸

美子

去矣不得別長府豈無財莫濟醫藥切太

倉豈無粟

才

莫解腹腸熱天子聖在上海內清欲徹伊

人胡不官

美子

既死安得活朝青與暮紫神喜天不軋昂

車與怒馬

才

門滿道不絕之子苟間廁斯民廼食餐高

亢世弗親

美子

方嚴鬼所製敢言足才珍寧免否來齧思

潛淚輒抽

才

慘舊面成羣舉目此牢落側身今鄙媒箴

言耳空虛

美子

險論口飲甌作詩告石梁聊以慰寒骨

才

地動聯句

大荒孟冬月

才叔

末旬高春時日腹昏盲

美子

風口鳴鳴

咿萬靈困陰戚

才叔

百植嗟陽衰濃寒有勝氣

美子

大凍無

敗期六指忽搖拽

才叔

羣蹠初奔馳九銅落蟾吻

美子

始異

張渾儀列宿犯天紀

才叔

預驗漢志辭民薨函鼓舞

美子

禁

堞強崩離坐駭市聲死

才叔

立怖人足踣坦途重車僨

美子

急傳壯馬欹陵阜動撫手

才叔

礫塊當揚箕停汚有亂浪

美子僵木無靜枝衆啄不暇息

才叔

沓嶂驚欲飛踊塏撼鐸

碎

美子

安流蕩舟疲倒壺喪午漏

才叔

顛巢駭眠鴟居人眩

眸子

美子

行客勞勦兒南北頓儵忽

才叔

西東播離披四鎮

一毛重

美子

百川寸涔微斗藪不知大

才叔

軒幹主者誰共

工豈復怒

美子

富媪安得為寧無折軸患

才叔

頓易崩山悲

衆蟄不安土

美子

羣毛難麗皮驚者去靡所

才叔

仆或如見

擠轟雷下簷瓦

美子

決玉傾倉染雙顛太室吻

才叔

四躍宸

庭螭萬宇變旋室

美子

百城如轉機念此大菑患

才叔

必由

政瑕疵勝社勇厥氣

美子

孤陽病其威傳是下乘上

才叔

亦

曰尊屈卑夫惟至靜者

美子

猶不可保之况乃易動物

才叔

何以能自持高者恐顛墜

美子

下者當鎮綏天戒豈得慢

才叔肉食宜自思變省孽可息

美子

損降禍可違願進小臣

語才叔兼為丹扆規偉哉聰明主

美子

勿遺地動詩

才叔

瓦亭聯句

陰霜策策風呼虺強敵膽開凶焰豪

美子

赤膠脆折乳馬

健漢野秋穰黃雲高

才翁

驅先老虺伏壯甲裹以山壑鬼

莫招美子蜂臺屹屹百丈起但報平安搖桔槔

才翁

喜聞羸

師入吾地主將踴躍士隨驕

子美

神鋒前揮擁勝勢橫陣

立敵俱奔逃

子美

不知餌牽落檻穽一麾發伏如驚飈

子美

重圍八面烏難度相顧無路惟青霄

子美

地形窄束甲刺

骨皆裂不復能相鏖

子美

棄兵衮衮今不殺部曲易主無

纖囂

子美

慟哭皇天未厭禍空同無色勁氣消

子美

狂童得

志賤物命隴上盤馬為嬉遨

子美

倉皇林間健兒婦剪紙

漑酒呼嗷嗷

子美

將軍疾趨占葬地年年載柩爭咸嶠

子美

朝廷不惜好官爵絳蜜刻印埋蓬蒿

子美

三公悲吟困數

敗車上輕重如鴻毛

才翁

白衣壯士氣塞腹憤勇不忍羞

本朝

子美

重瞳三顧可易得亮輩本亦生吾曹

才翁

窮居哀

牢厭咄咄歲月奔激朱顏彫

子美

當年請行大明下今日

顏墮思南巢

才翁

陽羨溪光逗蒼玉尺半健鯽煙中跳便

欲買田學秧稻不復與世爭緇毫奈何三世奉恩澤肯

以軀命辭枯焦

才翁

以知出處繫大義一飯四顧情如燒

賀蘭磨劒河飲馬旋師奏凱期崇朝歸來天下解倒掛

玉色藹藹宸歡饒

才翁

筆傾江河紙雲霧歎頌天業包陶



姚子  
美

淮上喜雨聯句

江淮經歲早春暮忽然雨

子美

亂點踰廣津散灑入原土

才翁

萬物氣稍蘇厲妖莫能聚

子美

羣山洗故塵紫翠坐可

才翁

數昏如籠纖紗媚若映紺縷

子美

碧瓦南崦中重疊出

才翁

迥覩扁舟凌空飛白鳥入煙舞

子美

遙林動新滋顏色

才翁

若可取碧草弄微芳低昂欲來語

子美

繁聲過沙頭上

下謳鷗櫓

才翁

濃淡新畫成快愜久病愈

子美

念此時多虞

豈得歲少阻

才

焦心閔疲農虛口待香稌

子美

縣吏事凶

貪氣若解縛虎

才

惟於縱誅斂乃能奮怒武

子美

青天雖

云明疑不照艱苦

才

此時忽霽霽知有神物主

子美

不然

諸蒼生性命委草莽

才

本麀邦豈寧皮去毛安附

子美

歌

此告巨公行當視前古

才

# 和石曼卿明河詠

八月銀河好天高夜自明樓臺通迥意風露得餘清幾  
為浮雲亂都宜小雨晴離人強回首耿耿邈無情

師黯以彭甘五子為寄因懷四明園中此果甚多  
偶成長句以為謝

憶向江東太守園猗猗甘樹蔽前軒風搖玉蕊霏微落  
霜發金衣委墜繁枕畔冷香通醉夢齒邊餘味滌吟魂  
天彭路遠無因得猶賴君心記舊恩

遊洛中舊內

洛陽宮闕鬱嵯峨千古榮華逐逝波別殿秋高風淅瀝  
後園春老樹婆娑露凝碧瓦寒光滿日轉觚稜暖艷多

早晚金輿此游幸鳳樓前後看山河

送家靜及第後赴官清水

幾年塵土客京華一日春乘犯斗槎夢好夜歸全蜀道  
眼明朝宴上林花白頭佐邑非為晚藍綬還鄉亦可誇  
況有雄圖看悟主莫傷孤宦向天涯

靜勝堂夏日呈王尉

虛堂吏事稀吟卧欲忘機窗靜蜂迷出簾輕燕誤飛煩  
心傾晚簟倦體快風衣更想霜雲外同君看翠微

黎生下第還鄉

人云之子賢文采出巴川失意聲名在還家歲月遷離  
懷春色裏歸路夕陽邊無廢青箱學窮愁古亦然

春日晚晴

人言春雨好更好晚來晴樹色通簾翠煙姿著物明得  
泥初燕喜避弋去鴻輕誰見危欄外斜陽盡眼平

遊南內九龍宮

昔帝龍驤後因池大此宮簫笳疊終日旌仗展無窮繪

塑神靈集飛潛爪角雄陰軒常隱霧暗堵亦含風巨盜  
來移國天王遽避戎蒼黃狩巴蜀倏忽陷河潼閣殿回  
看遠塵氛久見蒙歸來故基在不與往時同疊瓦煙間  
碧新蕖露下紅波春蕩初月沙晚發悲鴻世變今無復  
人愁杳莫終樹穿瑤甃裂碑碎玉樓空九曲皆遺石諸  
王祇斷蓬興亡何足問一一夕陽中

送陳進士遊江南

昔也衣裾已化塵驅車今去涉驚津淮天蒼茫背殘鴈

江路逶迤逢舊春時有飄梅應得句苦無蒸酒可霑巾  
歸來莫戀溪山勝楓鬼耶廠解笑人

和馬承之古廟

廟貌空山裏垣頽入逕斜尚應名竹素不復祭牲粢木  
暗鴉呼鬼庭荒雀啁虵有靈從寂寞慎勿學凶邪

和解生中秋月

不為人間意居然節物清銀塘通夜白金餅隔林明醉  
客尊前倒棲烏露下驚悲歡古今事寂寂墮荒城

宿太平宮

驅車長道久塵勞一宿清宮醒骨毛  
古檜有風天自籟石壇多露鶴爭鳴  
星河耿耿秋還迫樓觀澄澄夜更高  
吟對疎鐘俗機盡已疑身世屬仙曹

獨遊輞川

行穿翠靄中絕磴落疎鐘數里踏亂石  
一川環碧峰暗林麋養角當路虎留蹤  
隱逸何曾見孤吟對古松

過下馬陵



下馬陵頭草色春  
我來懷古一霑巾  
陵邊又有累累冢  
應是當年取酒人

覽含元殿基因想昔時朝會之盛且感其興廢故  
在昔朝元日千門動地來方隅正無事輔相復多才  
仗下簪纓肅天中繖扇開皇威瞻斗極曙色辨崔嵬  
赤案波光卷鳴梢電尾回熊羆驅禁衛雨露覆蘭臺  
橫賜傾中帑窮工役九垓只知營國用不畏屈民財  
翠輦還移幸旻天未悔災羣心尊困獸回首變寒灰  
曾以安無慮

翻令世所哀行人看碧瓦獨鳥下蒼苔雖念陵為谷遙知禍有胎青編遺跡在此地亦悠哉

望秦陵

雄心雖蓋世竟亦棄羣臣役重傾天下時危啟聖人石麟空舉首銀海罷流春隴闕今無復應深行路塵

留題樊川李長官莊

杜曲東邊風物幽我來繫馬獨淹留門前翠影山無數竹下寒聲水亂流酒壓新陳常得醉花開番次不知秋

主公堆案縈官事早晚歸來今白頭

宿終南山下百堦院

驅馬山前訪古蹤僧居瀟灑隔塵籠  
遶庭石鼈谷間水入戶鳴鴟堆上風  
無限老松秋色裏數聲疎鐸月明中  
村雞坐聽三號徹去去前朝氣味同

宿華嚴寺與友生會話

危構岌崑出太虛坐看斜日墮平蕪  
白煙覆地澄江濶皎月當天尺壁孤  
疎磬悲吟來竹閣青燈寂寞照吟軀

老僧怪我何為者說盡興亡涕淚俱

送王揚庭著作宰巫山

蘭臺舊漫郎為邑上瞿塘地僻風煙古公餘日景長江  
聲通白帝山勢入青羌落筆多佳句時應滿錦囊

晚意

晚色微茫至前山次第昏羸牛歸逕遠宿鳥傍簷翻盤  
喜黃粱熟盃餘白酒渾田家雖淡薄猶得離塵喧

春暮初晴自御宿川之華嚴寺

春暮曾無屬物心  
野行聊得據鞍吟  
路經廢苑情通古  
水遶蒼山意共深  
殘日花間浮暖艷  
斷雲樓外卷輕陰  
騷人自昔傷鶡鴒  
休苦風前送好音

次韻和師黯寄王耿端公

嫉惡曾收柱後冠  
淹淪今未復榮班  
青雲失路初心遠  
白雪盈簪壯志閒  
廢馬尚嘶驄奮迅  
篋衣猶曝繡爛斑  
風流縣尹多才思  
時寄篇章與解顏

聞京尹范希文謫鄱陽尹十二師魯以黨人貶郢

中歐陽九永叔移書責諫官不論救而謫夷陵  
令因成此詩以寄且寬其遠邁也

朝野蔚多士  
衰然良可羞  
伊人秉直節  
許國有深謀  
大議搖巖石  
危言犯采旒  
蒼黃出京府  
憔悴謫南州  
引黨俄嗟尹  
移書遽竄歐  
安慙言得罪  
要避曲如鉤  
郢路幾東馬  
荆川還汴舟  
傷心衆山集  
舉目大江流  
遠動家公念

念

師魯父作牧於東川

深貽壽母憂

永叔有母垂老

橫身罹禍難當路積

仇讐衛上寧無術  
亢宗非所優  
吾君思正士  
莫賦畔牢

愁

暑景

溽暑倦幽齋縱橫書亂堆風多應秀麥雨密不黃梅乳  
燕並頭語紅葵相背開吟餘晴月上涼思入樽罍

夏中

院僻簾深晝景虛輕風時見動竿烏池中綠滿魚留子  
庭下陰多燕引雛雨後看兒爭墜果天晴因客曝殘書  
幽棲未免牽塵事身世相忘在酒壺

夏意

別院深深夏簟清  
石榴開遍透簾明  
樹陰滿地日卓午  
夢覺流鶯時一聲

和淮上遇便風

浩蕩清淮天共流  
長風萬里送歸舟  
應愁晚泊喧卑地  
吹入滄溟始自由

先公之愛馬以病寄他廐今死矣

先君所乘馬其色白於銀  
磊落龍之種權奇世共珍  
獨



嘶如想望久步見精神方日照代夜拳毛刷渭津

先公在河

東陝右皆乘此馬

鬣寒如擁浪蹄駛不驚塵潦倒已伏櫪蒼黃

仍借人俄傳敝帷信無復錦蒙親倚棹思神駿蕭然淚灑巾

### 重過句章郡

曾隨使旆此東歸日日登臨到落暉疇昔侍行猶總角  
如今重過合霑衣窺魚翠碧忘形坐趁伴蜻蜓照影飛  
風物依然皆自得歲華飄忽賞心違

晚出潤州東門

京口古雄處昔年嘗此過  
風流看石獸人事共江波  
河轉路疑盡日斜山更多  
城樓鬱天半回首恣吟哦

無錫惠山寺

寺古名傳唐相詩三伏奔迸予何之  
雲山相照翠會合殿閣對走涼參差  
清泉絕無一塵染長松自是拔俗姿  
二邊戈戟日鬪格釋子宴坐殊不知

過蘇州

東出盤門刮眼明蕭蕭疎雨更陰晴綠楊白鷺俱自得  
近水遠山皆有情萬物盛衰天意在一身羈苦俗人輕  
無窮好景無緣住旅棹區區暮亦行

秀州通越門外八九里臨水多佳木茂樹以便風  
不得停舟一賞愴然為詩

密樹重蘿覆水光珍禽無數語琅琅驚帆瞥過如飛鳥  
回首風煙空斷腸

秀州城外九里有竹樹小橋予十八年前與友人

解晦叔飲別于此今過之景物依然而解生已  
亡悲歎不足復成小詩

當年共醉此橋邊道舊狂歌至暮天得句旋題新竹上  
移舟還傍亂花前君埋塵土骨應化我逐風波心欲燃  
落日長號感人事沙頭寂寞上漁船

天章道中

畫鷁低飛湖水平高低樓閣滿稽城人遊鑑裏山相照  
魚戲空中日共明盡是荷風香不斷忽逢溪雨氣尤清

藍輦却上蘭亭步猿鳥雲蘿伴此行

望太湖

杳杳波濤閱古今四無邊際莫知深潤通曉月為清露  
氣入霜天作暝陰笠澤鱸肥人膾玉洞庭柑熟客分金  
風煙觸目相招引聊為停橈一楚吟

大禹寺

鑑湖盡處衆峰前寺古蕭疎水石間殿閣北垂連禹廟  
松筠東去入稽山坐中巖鳥自上下吟久溪雲時往還

我厭區區走名宦未能來此一生閒

杭州巽亭

公自登臨闢草萊赫然危構壓崔嵬涼翻簾幌潮聲過  
清入琴樽雨氣來疇昔江山何處好生平懷抱此中開  
東南地本多幽勝此向東南特壯哉

松江長橋未明觀魚

曙光東向欲朧明漁艇縱橫映遠汀濤面白煙昏落月  
嶺頭殘燒混疎星鳴榔莫觸蛟龍睡舉網時聞魚鼈腥

我實宦遊無況者擬來隨爾帶苓箸

淮中晚泊犢頭

春陰垂野草青青時有幽花一樹明  
晚泊孤舟古祠下  
滿川風雨看潮生

湘公院冬夕有懷

去年急雪灑窗夜獨對殘燈觀陣圖  
今夕悲風撼軒竹  
又來開卷擁寒罍  
禪房瀟灑皆依舊  
世路崎嶇有萬殊  
離京後作

春風奈別何一棹逐驚波去國丹心折流年白髮多脫  
身離網罟含笑入煙蘿窮達皆常事難忘對酒歌

答和叔春日舟行

幽人漂泊興無窮弄水尋花處處同春入水光成嫩碧  
日勻花色變鮮紅靜中物象知誰見間極情懷覺道充  
寄語悠悠莫疑我五湖今作狎鷗翁

舟行有感

忽忽賞節物區區何所歸天陰鳥自語水落岸生衣客



况知誰念人生與願違東風百花發獨采北山薇

淮亭小飲

山氣復清淮亭臨亂石開旅愁無處避春色為誰來酒  
賴啼鶯送歌隨去雁哀相攜聊一醉休使壯心摧

壽陽間望有感

維舟亭下偶登臨下蔡風流古至今遠嶺抱淮隨曲折  
亂雲行野乍晴陰幽人憔悴搔白首啼鳥哀鳴思故林  
觸處塗窮何足慟直回天地入悲吟

阻風野步有感呈子履

輕舟留滯已春殘攜手悽悽田野間  
盡日東風吹百草有時雙鷺下前灣  
古來少見如君困世上應無似我閒  
斗擲塵襟莫回首謗書終不到溪山

過泗水

五年六經此仰首歎勞生山是往時色  
人皆今日情機心去國少塵眼向淮明  
物理吾俱曉漂流安足驚

和丹陽公素學士晚望見懷

古郡登臨足勝遊使君才調更風流過雲送雨海山暗  
斜日催蟬江樹秋屢辱嘉招嗟放棄又傳新詠慰淹留  
霜天乘興當西謁共醉城尖四望樓

送子履

一舸風前五兩飛南遷今去別慈闈人生多難古如此  
吾道能全世所稀幸有江山聊助思莫隨魚鳥便忘歸  
君親恩大須營報學取三春寸草微

題花山寺壁

寺裏山因花得名繁英不見草縱橫栽培剪伐須勤力  
花易凋零草易生

春睡

別院簾昏掩竹扉朝醒未解接春暉身如蟬蛻一榻上  
夢似楊花千里飛嗒爾暫能離世網陶然直欲見天機  
此中有德堪為頌絕勝人間較是非

覽照

鐵面蒼髯目有稜世間兒女見須驚心曾許國終平寇

命未逢時合退耕不稱好文親翰墨自嗟多病足風情  
一生肝膽如星斗嗟爾頑銅豈見明

秋懷

年華冉冉催人老風物蕭蕭又變秋家在鳳凰城闕下  
江山何事苦相留

中秋松江新橋對月和柳令之作

月晃長江上下同畫橋橫絕冷光中雲頭豔豔開金餅  
水面沉沉臥綵虹佛氏解為銀色界仙家多住玉華宮

地雄景勝言不盡但欲追隨乘曉風

病中得杜丞相見寄詩感而有作

易毀唯遷客難諳是俗情愁多怯秋夜病久厭人生委  
順聞之舊衰羸見者驚新詩如接待吟罷涕淋纓

滄浪懷貫之

滄浪獨步亦無悰聊上危臺四望中秋色入林紅黯淡  
日光穿竹翠玲瓏酒徒漂落風前燕詩社凋零霜後桐  
君又暫來還徑去醉吟誰復伴衰翁

和彥猷晚宴明月樓二篇

溪聲來從一氣外樓角插在蒼霞中  
豔歌橫飛送落日  
哀箏自響吹霜風低昂黛色四山黯  
凌亂纈紋疎樹紅  
憑欄揮手問世俗何人得到蟾蜍宮

向晚天邊燕席開溪山相照絕纖埃  
綠楊有意簷前舞  
涼月多情海上來香穗縈斜凝畫棟  
酒鱗環合起金罍  
自疑身是乘槎客泛徹銀河却欲回

依韻和王景章見寄

歲律崢嶸臘候深一天風雪卷愁陰故人默默懷交意  
逐客悽悽上國心千里相望空眇盼當年下吏阻追尋  
咄嗟謗口聞高誼披豁羈懷見雅吟學道元將禦窮困  
浮生何必計升沈世間機穽知難避往者圖書可自箴  
猶得雲山開醉眼可無俗物撓沖襟鵬來間暇何須怪  
鬼見邪歛豈易禁楚客留情著香草啓期傳意入鳴琴  
夫君自上丹丘去莫忘雲泉寄好音

答仲儀見寄



前歲京都吏議喧  
勁弓摧翮雨連翩  
男兒窮困終歸道  
世路傾危自有天  
雲壑已通塵外意  
茅齋仍得日高眠  
寄聲吾舅無相念  
今作江湖九館仙

雨中聞鶯

嬌騃人家小女兒  
半啼半語隔花枝  
黃昏雨密東風急  
向此漂零欲泥誰

秋雨

陰風攪林壑  
驟雨到江湖  
白日不覺沒  
繁雲何處無  
樓

吟涼筆硯溪夢亂菰蒲聞說京華甚污泥入敝廬

懷月來求聽琴詩因作六韻

正聲今遁矣古道此焉存商緩知臣僭風熏見帝尊雄  
豪尚餘勇淡泊忽忘言繁極殊無間來長若有源已能  
通變化直可探胚渾此理師應得西風獨掩門

送黃通

浪遊天下訪知音健節亭亭恥陸沉當日拜官隨鶴版  
此時孤宦入蛇林羈愁雖得著書樂風物能傷遷客心

顧我冥頑如瓦石為君分袂亦悲吟

秋宿虎丘寺數夕執中以詩見貺因次原韻

生事飄然付一舟吳山蕭寺且淹留  
白雲已有終身約  
醪酒聊驅萬古愁  
峽束蒼淵深貯月  
巖排紅樹巧裝秋  
裴回欲出向城市  
引領煙蘿還自羞

夢歸

雨隔疎鐘曉不知春風吹夢過江西  
雨聲破夢北窗響  
臥憶江西路亦迷

獨步游滄浪亭

花枝低歌草色齊不可騎入步是宜時時攜酒祇獨往  
醉倒惟有春風知

初晴遊滄浪亭

夜雨連明春水生嬌雲濃暖弄微晴簾虛日薄花竹靜  
時有乳鳩相對鳴

遊招隱道中

揚鞭望招隱塵思漠然收雲接青林合泉兼碧草流疎

鐘傳別壑晚日動前樓嘉遁平生志吁嗟得暫遊

揚州城南延賓亭

亂蟬咽咽柳霏霏獨上危亭俯落暉江外山從林下見  
城中人向渡頭歸風煙遠近思高遁豺虎縱橫難息機  
出處兩乖空自撓傷哉吾道欲何依

晚泊龜山

南灣晚泊一裘回小徑山間佛寺開石勢向人森劍戟  
灘光和月瀉瓊瑰每傷道路銷時序但屈心情入酒盃

夜籟不喧羣動息長吟聊以寄餘哀

滄浪靜吟

獨遶虛亭步石缸靜中情味世無雙  
山蟬帶響穿疎戶野蔓盤青入破窗  
二子逢時猶死餓三閭遭逐便沉江  
我今飽食高眠外唯恨澄醪不滿缸

丹陽子高得逸少瘞鶴銘於焦山之下及梁唐諸  
賢四石刻共作一亭以寶墨名之集賢伯鎮為  
之作記遠來求詩因作長句以寄

山陰不見換鵝經京口今存瘞鶴銘瀟灑集仙來作記  
風流太守為開亭兩篇玉蕊塵初滌四體銀鉤蘚尚青  
我久臨池無所得願觀遺法快沉冥

遊雪上何山

今古何山是勝遊亂峰縈轉繞滄洲雲含老樹明還滅  
石礙飛泉咽復流徧嶺煙霞迷俗客一溪風雨送歸舟  
自嗟塵土先衰老底事孤僧亦白頭

冬日偶書

謾走聲名三十年亦曾文采動君前  
王顏皓齒他人樂  
獨守殘燈理斷編

寒夜十六韻答子履見寄

風雨夜寒新空齋感慨頻  
詩書窮不放燈火靜相親  
眺聽時懷土低推動畏人

魏文詩云客子常畏人

漫書成咄咄遠吠

厭狴狴念昔罹憂患惟君共苦辛  
漂流數千里會合十餘旬  
各閔傷弓翼聊同吮沫鱗  
誰知公治罪衆笑伯龍貧  
隔絕今一水睽離將再春  
嘉篇數為貺尺牘亦相珍



倚伏時難定屯亨理亦循  
劒埋猶有氣蠖屈尚能伸  
邦國方登俊江湖且放神  
不憂知在命任重莫如身  
白首襟期遠青雲志業均  
陶然任元化慎勿損天真

獨遊曹氏園因寄伯玉

去年把酒共裴回今日尋幽此獨來  
竹密似嫌間客入梅含應待主人開  
贊謀盛府方投刃捍患長堤正展才  
早晚得歸如舊約伴君池上倒樽罍

小酌

寒雀喧喧滿竹枝驚風淅瀝玉花飛  
霜柑糖蟹新醅美  
醉覺人生萬事非

送人還吳江道中作

江雲春重雨垂垂索莫情懷送客歸  
不憤東流促行棹  
羨他雙燕逆風飛

題廣喜法師堂

我為名驅苦俗塵師知法喜自怡神  
未如歡戚兩忘者  
始是人間出世人

詩僧則暉求詩

全吳氣象豪詩思合翹翹風雅久零落江山應寂寥會  
將趨古澹先去浮囂好約長吟處霜天看怒潮

關都官孤山四照閣

勢壓蒼崖險可驚攀雲半日到軒楹旁觀竹樹回環翠  
下視湖山表裏清漸覺愁隨煙霧散只疑身有羽翰生  
他年君掛朱幡後蠟屐筇枝伴此行

清軒

誰鑿幽軒刮眼清湖中嘉處更禪局龍聽夜講寒生席  
鷗伴晨齋暖戲庭水月澄明應作觀雲山濃淡自開屏  
我公亦為留奇句此地人間合有靈

某為世所棄困居于蘇平生交遊過門不顧長安  
侍讀葉丈不以秦吳之遠高下之隔閤此窮悴  
特貺以詩然韻險句奇不可攀續仰酬高誼強  
挾蕪音

公鎮西都擁劇權遠嗟窮苦寄新篇氣雄迥出關河外

句險空驚魚鳥前玉帳夜嚴兵似水茅齋春靜草如煙  
才愚榮悴皆殊絕自笑相酬更斐然

暑中間詠

嘉果浮沉酒半醺牀頭書冊亂紛紛北軒涼吹開疎竹  
卧看青天行白雲

寄題趙叔平嘉樹亭

嘉樹名亭古意同拂簷圍砌更青葱午陰閒淡茶煙外  
曉韻蕭疎睡雨中開戶常時對君子遶軒終日是清風

盤根得地年年盛豈學春林一餉紅

西軒垂釣偶作

曾以文章上石渠忽因讒口出儲胥致君事業堆胷臆  
却伴溪童學釣魚

夜聞竿酒有聲因而成詠

糟牀新壓響泠泠歌枕初聞睡自輕幾段愁悰俱滴破  
一番歡意已窮成空階夜雨徒傳句三峽流泉無此聲  
只待松軒看飛雪呼賓同引甕頭清

秋夕懷南中故人

向夕依欄念昔遊  
蕭條節物更他州  
池光不動天深碧  
月色無情人獨愁  
千里江山幽信絕  
一場風露敗荷秋  
征鴻急急知何事  
斷續哀鳴過不休



宋詩鈔卷五





總校官庶吉士臣張能照

校對官庶吉士臣陳文樞

謄錄監生臣趙友彬